

M355: Winsbeke und Winsbekin (I[J])

0,1 ein wîser man hête einen sun .
0,2 der was im lieb als maniger ist .
0,3 den wolte er rehte lêren tuon .
0,4 unde sprach alsô “mîn sun dû bist .
0,5 mir lieb âne allen valschen list .
0,6 bin ich dir lieb sam dû mir .
0,7 sô volge mir ze dirre vrist .
0,8 die wîl ich lebe ez ist dir guot .
0,9 ob dich ein vremeder ziehen sol .
0,10 dû weist niht wie er ist gemuot .
0,0 wie man got vûrhten sol vûre alliu dinc .
0,1 sun minne reiniclîchen got .
0,2 sô kan dir niemer missegân .
0,3 er hilfet dir ûz aller nôt .
0,4 nû sich der werlt goukel an .
0,5 wie si ire volgær triegen kan .
0,6 unde waz ire lôn ze dem jungesten sî .
0,7 daz solt dû sinniclîche verstân .
0,8 si wiget ze lône ein swindez lôt .
0,9 der ir ze willen dienen wile .
0,10 der ist lîbes unde der sêle tât .
0,0 wie daz mennische swindet als daz brinnente kerzen licht
0,1 sun merke wie daz kerzen licht .
0,2 die wîl ez brinnet swindet gar .
0,3 geloube daz dir sam geschihet .
0,4 von tage ze tage ich sage dir wâr .
0,5 des nim in dînen sinnen war .
0,6 unde rihte hier dîn leben alsô .
0,7 daz dort dîn sêl wole gevar .
0,8 swie hôch an guote wirdet dîn name .
0,9 dir volget niht wan alsô vile .
0,10 ein lînîn tuoch vûre dîn scham .
0,0 wie man almuosen sol geben .
0,1 sun gip im der dir hât gegeben .
0,2 unde aller gâbe hât gewalt .
0,3 er gât dir noch ein iemerleben .
0,4 unde ander gâbe manicvalt .
0,5 mêr danne loubes habe der walt .
0,6 wilt dû nû koufen disen hort .

0,7 in sînen hulden dich behalt .
 0,8 und sende guote boten vûre .
 0,9 die dir dort vâhen wîten ruom .
 0,10 ê daz der wirt zuo slahe die tûre .
 0,0 wie wereltlich wîstuom ist gein gote ein tôrheit .
 0,1 sun alliu wîsheit ist niwiht .
 0,2 die herzen sin ertrahten kan .
 0,3 hât er ze gote der minne niht .
 0,4 unde sihet in niht mit vorhten an .
 0,5 ez sprach hier vore ein wîser man .
 0,6 daz dirre werlt wîsheit sî .
 0,7 vore gote ein tôrheit sunder wân .
 0,8 dâ von sô rihte dînen sin .
 0,9 daz dû in sînen hulden lebest .
 0,10 unde lâz dich aller dinge an in .
 0,0 wie man geistlich leben êren sol
 0,1 sun geistlich leben in êren habe .
 0,2 daz wirdet dir guot unde ist ein sin .
 0,3 des willen kum durch nieman ab .
 0,4 bringe in ze dîner gruobe hin .
 0,5 ez wirdet an sælden dîn gewin .
 0,6 en ruoche wie die pfaffen leben .
 0,7 dû solt doch dienen gote an in .
 0,8 sint guot ire wort ire werc ze krump .
 0,9 sô volge dû iren Worten nâch .
 0,10 ire werken niht oder dû bist tump .
 0,0 wie man den pfaffen sol sprechen wole .
 0,1 sun ez was ie der leien site .
 0,2 daz si den pfaffen truogen haz .
 0,3 dâ sündent si sich sêr mit .
 0,4 ich kan niht wîzen umbe waz .
 0,5 ich wile dir râten verre baz .
 0,6 dû solt in holt mit triuwen sîn .
 0,7 unde sprich in schône unde tuost dû daz .
 0,8 sô mac dîn ende werden guot .
 0,9 und wirdet ze lône dir beschert .
 0,10 gotes lîchnam unde sîn reinez bluot .
 0,0 wie er einmüetic sol sîn mit sîner konen .
 0,1 sun ob dir got vüege ein wîp .
 0,2 nâch sînem lobe ze rehter . ê .
 0,3 die solt dû hân als dînen lîp .
 0,4 unde vüege daz ez sô bestê .
 0,5 daz iuwer beider wille gê .
 0,6 ûze einem herzen unde dâr in .
 0,7 waz wilt dû danne wûnne mêr .
 0,8 ob daz geschihet in triuwen pflege .
 0,9 sæjet aber diu werre ire sâmen dar .
 0,10 sô müezen scheiden sich die wege .

0,0 wie er tougen minne sol helen .
 0,1 sun dû solt sinniclichen tragen .
 0,2 verholen dîn minnevingerlîn .
 0,3 dîn tougen niht den tumben sagen .
 0,4 daz zwein ist reht ze wît ist drîen .
 0,5 lâ dich niht über gên den wîn .
 0,6 den solt dû sô ze hûse laden .
 0,7 daz dîn vîande iht spotten dir .
 0,8 ahte ûf die zûngelær niht .
 0,9 di werren zwischen vriunden tragen .
 0,10 unde daz in Judas aht geschihet .
 0,0 wie man sol guotliche unde mit witzen antwûren .
 0,1 sun swer bî dir ein mære sage .
 0,2 mit worten im ez niht underbrich .
 0,3 unde swer dir sînen kumber klage .
 0,4 in schame über den erbarme dich .
 0,5 der milt got erbarmet sich .
 0,6 über alle die erbarmic sint .
 0,7 den wîben allen schône sprich .
 0,8 ist ienert einiu sælden vrî .
 0,9 dâ bî sint tûsent oder mêr .
 0,10 den tugent unde êre wonet bî .
 0,0 wie man guotiu wîp êren sol .
 0,1 sun wilt dû zieren dînen lîp .
 0,2 sô daz er sî unvuoge gram .
 0,3 sô minne unde êre guotiu wîp .
 0,4 der tugent uns ie von sorgen nam .
 0,5 si sint wûnne ein bernter stam .
 0,6 dâ von wir alle sîn geboren .
 0,7 er hât niht zuht noch rehter schame .
 0,8 der daz niht erkennet an in .
 0,9 der muoz der tôren einer sîn .
 0,10 und hête er Salomones sin .
 0,0 wie wîp sint stam aller wûnne .
 0,1 sun si sint wûnne ein berntez licht .
 0,2 an êren unde an werdicheit .
 0,3 der werlt an vrôuweden zuoversiht .
 0,4 nie wîser man daz widerstreit .
 0,5 ire name der êren krône treit .
 0,6 diu ist gemezzen unde geworht .
 0,7 mit tugenden vollic unde breit .
 0,8 genâde got an uns begie .
 0,9 dô er im engel dort geschuof .
 0,10 daz er si gap vûre engel hier .
 0,0 wie man den wîben wole sprechen sol .
 0,1 sun dû maht niht wîzen wole .
 0,2 waz êren an den wîben lît .
 0,3 ob ez dir sælde vûegen sol .

0,4 daz dû gelebest die lieben zît .
0,5 daz dir ire güete vröuwede gît .
0,6 sô kan dir niemer baz geschehen .
0,7 ze dirre werlt sunder strît .
0,8 dû solt in holt mit triuwen sîn .
0,9 unde sprich in wole tuost dû des niht .
0,10 sô muoz ich mich untroesten dîn .
0,0 wie reines wîbes güete ist ein getranc .
0,1 sun wilt dû erzenîe nemen .
0,2 ich wile dich lêren ein getranc .
0,3 lât dir ez vrouwe sælde wole gezemen .
0,4 dû wirdest selten tugent kranc .
0,5 dîn leben sî kurz oder ez sî lanc .
0,6 lege in dîn herze ein reinez wîp .
0,7 mit stæter liebe sunder wanc .
0,8 ist ez an werdicheit verzaget .
0,9 als der trîac daz eiter tuot .
0,10 ire wîplich güete dir ez verzaget .
0,0 wie wîplich güete trûren stoert .
0,1 sun ich sage dir ez sunder wân .
0,2 eines mannes herze ist ungesund
0,3 daz sich niht innen reinen kan .
0,4 mit wîbes liebe ze aller stunt .
0,5 ez was ein tugentlîcher vunt .
0,6 dô guoter wîbe wart gedâht .
0,7 hât ieman sorge swæren bunt .
0,8 den trûric muot bestricket hât .
0,9 der strîche wîplich güete dar .
0,10 alsam ein tou sîn nôt zergât .
0,0 wie dem sælde volget der guotiu wîp minnet .
0,1 sun sît diu sælde lît an in .
0,2 diu nie mit lobe ire zil volmaz .
0,3 sô diene in gerne unde hâs dû sin .
0,4 dû lebest in êren dester baz .
0,5 got sîn an sælden nie vergaz .
0,6 dem ire genâde wirdet beschert .
0,7 unde er mit triuwen dienet daz .
0,8 dem stêt der schilt ze halse wole .
0,9 im kumet ze lône ein blanker arm .
0,10 dâ im der rieme ligen sol .
0,0 hier saget er von des schildes werdicheit .
0,1 sun dû solt wizzen daz der schilt
0,2 hât werdicheit unde êren vile .
0,3 den rîtær tugent niht bevilet .
0,4 der in ze rehte tragen wile .
0,5 die wârheit ich dich niht en hile .
0,6 er ist ze der werlt sunder wân .
0,7 ein hôchgemezzen vröuweden zil .

0,8 nimet in ze halse ein tumber man .
0,9 der im sîn reht erkennet niht .
0,10 dâ ist der schilt unschuldic an .
0,0 waz zuo dem schilde gehoert .
0,1 sun lât dich got geleben die zît .
0,2 daz er mit rehte wirdet dîn dach .
0,3 waz er dir danne vrôuwede gît .
0,4 wilt dû im denne volgen nâch .
0,5 weist dû wie Gahmuret geschach .
0,6 der von des schildes werdicheit .
0,7 der môrinne in ire herze brach .
0,8 si gap im liute lant unde guot .
0,9 er gît ouch dir noch hôhen prîs .
0,10 gîst dû im lîp herze unde muot .
0,0 waz schildes reht sî .
0,1 sun wilt dû ganzlîche schildes reht .
0,2 erkennen sô wis wole gezogen .
0,3 triuwe milte küene unde sleht .
0,4 sô ist er an dir niht betrogen .
0,5 unde kumet dîn lop wole vûre gevlogen .
0,6 wilt aber dû leben in vrîer wal .
0,7 den tugenden allen vore verlogen .
0,8 der rede mîn triuwe sî dîn pfant .
0,9 wilt dû in alsô ze halse nemen .
0,10 er hienge baz an einer want .
0,0 waz er tuon sol sô er den helm ûf gebindet
0,1 sun biz dîn helm geneme den stric .
0,2 sô wis muotic unde balt .
0,3 gedenke an reiner wîbe blic .
0,4 der gruoze man ie mit dieneste galt .
0,5 sitz ebene unde swende sô den walt .
0,6 als dir von art sî geslaht .
0,7 mîn hant hât manigen ab gevalt .
0,8 des selben muoze ich mich verwegen .
0,9 guot rîterschaft ist topelspil .
0,10 diu sælde muoze des siges pflegen .
0,0 wie er sol des kômenten vâren an der tjoste .
0,1 sun nim des gein dir kômenten war .
0,2 unde senke schône dînen schaft .
0,3 als ob er sî gemâlet dar .
0,4 lâz an dîn ors mit meisterschaft .
0,5 ie baz unde baz rûer im die kraft .
0,6 ze den nageln vieren ûf den schilt .
0,7 dâ sol dîn sper gewinnen haft .
0,8 oder dâ der helm gestricket ist .
0,9 diu zwei sint reht rîters mîle .
0,10 unde ûf der tjoste der bezziste list .
0,0 wie sich der man sol kleiden mit tugenden .

0,1 sun wilt dû kleiden dîne jugent .
 0,2 daz si ze hove in êren gê .
 0,3 snît an dich zuht unde reine tugent .
 0,4 ich weiz niht waz dir baz an stê .
 0,5 wilt dû in tragen in rehter . ê .
 0,6 si machet dich den werden wert .
 0,7 unde gît dir dannoch sælden mêr .
 0,8 ich meine reiner wîbe segen .
 0,9 der ist ein sô genæmer hort .
 0,10 in mohte ein lant niht widerwegen .
 0,0 wie er niht hoeren sol boesiu mæ .
 0,1 sun dû solt bî den werden sîn .
 0,2 unde lâ ze hove dringen dich .
 0,3 der man ist nâch den sinnen mân .
 0,4 dâr nâch als er gesellet sich .
 0,5 ze rehte swîc ze staten sprich .
 0,6 die boesiu mæ dir ze ôren tragen .
 0,7 von in dîn stætez herze brich .
 0,8 wilt dû dîn ôr als maniger tuot .
 0,9 den velschelæren bieten dar .
 0,10 sô wirstest dû selten wolegemuot .
 0,0 wie man sol der zungen hûeten .
 0,1 sun dû solt dîner zungen pflegen .
 0,2 daz si iht ûz dem angel var .
 0,3 si lât dich anders under wegen .
 0,4 der êren unde der sinne bar .
 0,5 schiuz rigel vûre unde nim sîn war .
 0,6 gezemet sî vile rehte dîn zorn .
 0,7 si gæbe umbe êre niht ein hâr .
 0,8 wirdet si dîn meister wizze daz .
 0,9 si setzet dich in gotes zorn .
 0,10 unde dienet dir der werlte haz .
 0,0 wie man die rede besnîden sol .
 0,1 sun bezzer ist gemezzen zwire .
 0,2 denne gar verhouwen âne sîn .
 0,3 ê daz diu rede entrinne dir .
 0,4 ze gæhes ûz dem munde hin .
 0,5 besnît si wole ûf den gewin .
 0,6 daz si den wîsen wole behage .
 0,7 daz wort mac niht hin wider in .
 0,8 und ist doch schier vûre den munt .
 0,9 wilt dû des râtes volgen niht .
 0,10 dû wirstest an êren ungesunt
 0,0 wie man sich hûeten sol vore valschen liuten .
 0,1 sun swer ze blicke vuoc entnimet .
 0,2 daz decket doch die lenge niht .
 0,3 geribenu varwe niht en zimet .
 0,4 dâ man den schaden blecken sihet .

0,5 die helkeppelîn sint enwiht .
0,6 die bî den liuten kleident wole .
0,7 unde daz in kûndicheit geschihet .
0,8 nû ziehe er sîn kappen ab .
0,9 der alsô welle triegen dich .
0,10 und merke waz er dâr under habe .
0,0 wiegetân nôt der spot bîret .
0,1 sun merke rehte wie der rot .
0,2 daz îsen viulet unde den stahel .
0,3 alsô tuot unbescheiden spot .
0,4 des mannes herze sunder twâl .
0,5 ez ist ein sældenvlûhtic mâl .
0,6 unde slîchet umbe unde umbe entwer .
0,7 von dem ze dem als ein swalch .
0,8 sun dâ solt dû dich hûeten vore .
0,9 dû maht niht sanfte von im komen .
0,10 ob er dich bringet in daz spor .
0,0 wie edel âne tugent ist ze nihte .
0,1 sun hôch geburt ist an dem manne .
0,2 unde an dem wîbe gar verloren .
0,3 dâ wir niht tugent kiesen an .
0,4 als in den Rîn geworfen ein korn .
0,5 der tugent hât der ist wolegeboren .
0,6 unde êret sîn geslehte wole .
0,7 ich hân ze vriunde mir erkoren .
0,8 den nidern baz der êren gert .
0,9 vûre einen hôhen sunder tugent .
0,10 der hiure ist boeser danne vert .
0,0 wie man des guotes niht vile ahten sol .
0,1 sun dû solt haben und minnen guot .
0,2 alsô daz ez dir niht lige ob .
0,3 benimet ez dir tugent unde vrîen muot .
0,4 sô stêt dîn herze in krankem lobe .
0,5 guot ist gîticheit ein klobe .
0,6 swem ez lieber ist danne got .
0,7 und wereltlich êr ich wæne er tobe .
0,8 swen ez alsô gevazzet vûre .
0,9 der ânet sich der beider lieber .
0,10 ê daz er daz ein verlûre .
0,0 wie man niht sol sîn übermilte
0,1 sun dînen guoten vriunt behalt .
0,2 der dir mit triuwen bî gestât .
0,3 unde wis in zorne niht ze balt .
0,4 mit gæhen siten daz ist mîn rât .
0,5 ob dir daz guot ze nâhen gât .
0,6 unde ob dû ez âne tugent vertuost .
0,7 diu beidiu machent missetât .
0,8 wirf in die milte dînen sin .

0,9 habe unde henge vürhte got .
 0,10 sô gât dîn leben mit selden hin .
 0,0 wie man in der mâze sol leben .
 0,1 sun merke daz diu mâze gât .
 0,2 vile êren unde werdicheit .
 0,3 die solt dû minnen ze aller zît .
 0,4 sô wirdet dîn lop den werden breit .
 0,5 ist daz den wandelbæren leit .
 0,6 waz umbe daz der boesen haz .
 0,7 die biderben selten ie vermeit .
 0,8 lebe dû in tugentlîcher aht .
 0,9 unde lâz die krancgemuoten leben .
 0,10 als in von art sî geslaht .
 0,0 wie man sich sol an nemen daz man volbringen mac .
 0,1 sun sô der vogel . êr . rehter zît .
 0,2 von sînem neste vliegen wile .
 0,3 sich selben er vile lîhte gât .
 0,4 den tumben kinden ze einem spile .
 0,5 die rede ich dir gelîchen wile .
 0,6 nimest dû dich an des dû niht maht .
 0,7 volenden unde ist dir ze vile .
 0,8 daz muost dû ligen âne êre lân .
 0,9 sô wær verre bezzer dir .
 0,10 unde wær ez nie gevangen an .
 0,0 wie man niht ze gæhe sol sîn .
 0,1 sun hep daz dû getragen maht .
 0,2 daz dir ze swær sî daz lâ ligen .
 0,3 swer gerne über houbete vaht .
 0,4 der mohte dester wirs gesigen .
 0,5 dich ist der wîsen lop verzigen .
 0,6 wilt dû ze gæhes muotes sîn .
 0,7 âne allen rât und unverswigen .
 0,8 sô kumet dir gar daz sprichwort wole .
 0,9 des muotes al ze gæher man .
 0,10 vile trægen esel rîten sol .
 0,0 wie man wîsen ræten volgen sol
 0,1 sun dû solt selten schaffen iht .
 0,2 âne dîner wîsen vriunde rât .
 0,3 ob dir dâr an gelünge niht .
 0,4 daz wær niht ein missetât .
 0,5 swer wîser liute lêre hât .
 0,6 unde in mit willen volget nâch .
 0,7 dem gêt ze sælden ûf sîn sât .
 0,8 diu mæR vile dicke zweient sich .
 0,9 dâ von solt dû daz bezziste welen .
 0,10 unde folge dem daz êret dich .
 0,0 wie man den ræten mit werken folgen sol .
 0,1 sun swer sich selben êren wile .

0,2 der nimet getriuwes râtes war .
0,3 man verlieset guoter ræte vile .
0,4 an einem herzen tugende bar .
0,5 swer râtet unde dienet dar .
0,6 dâ man ez ze dieneste niht vervâhet .
0,7 der verliuset sînen willen gar .
0,8 swaz vriunde vriunt gerâten mac .
0,9 er welle selber stiuren sich .
0,10 ez ist in einen bach ein slac .
0,0 wie man sich tugent vlîzen sol .
0,1 sun si jehent al ez brenne vruo .
0,2 daz ze der nezzeln werden sol .
0,3 dîn junger muot daz selbe tuo .
0,4 daz kumet dir in dem alter wole .
0,5 mit dir ich leides mich erhole .
0,6 mîn trôst ist ûf dich einen komen .
0,7 dîn lîp mîn lîp dîn leit mîn dol .
0,8 got tuo mich zweier sorgen bar .
0,9 daz dû iht werdest ungemuot .
0,10 unde daz dîn sêl iht missevar .
0,0 wie man sol guot gewoneheit haben .
0,1 drîzic jâr ein tôre gar .
0,2 der muoz ein narre vûrebaz sîn .
0,3 die wîsen sprechent ez sî wâr .
0,4 ez ist vile dicke worden schîn .
0,5 unde ist ouch der geloube mîn .
0,6 gewoneheit ist dâ schuldic an .
0,7 diu gît dem lîbe solichen pîn .
0,8 des er von kintheit ist gewon .
0,9 ez sî im schade ez sî im vrum .
0,10 dâ kumet er âne got niht von .
0,0 wie man die ungetriuwen vliehen sol
0,1 sun dû solt hovelîche site .
0,2 in dînen sinnen lâzen pfaden .
0,3 behüete dich vore einem snite .
0,4 der tuot an êren grôzen schaden .
0,5 dâ mit was Judas überladen .
0,6 swer in dem snite noch vunden wirdet .
0,7 der muoz mit im ze der helle baden .
0,8 ich meine untriuwe uns seit diu schrift .
0,9 si sî der arm sêle dort .
0,10 unde hier des lîbes ein vergift .
0,0 wie man sol sîn stâtes muotes unde wole gezogen .
0,1 sun dû solt kiuscher worte sîn .
0,2 unde stâtes muotes tuost dû daz .
0,3 sô habe ez ûf die triuwe mîn .
0,4 dû lebest in êren dester baz .
0,5 trac niemanne nît unde langen haz .

0,6 wis gein vîanden hôchgemuot .
0,7 den vriunden niht mit dieneste laz .
0,8 dâ bî in zûhten wole gezogen .
0,9 unde grûeze den dû grûezen solt .
0,10 sô hât dich sælde niht betrogen .
0,0 wie man hôchvart unde gîticheit vliehen sol .
0,1 sun hôchvart unde gîticheit .
0,2 diu zwei sint boese nâchgebûr .
0,3 an den der tiuvel sich versneit .
0,4 daz im sîn sûeze wart ze sûr .
0,5 sîn schoene swarzer danne ein ûr
0,6 in slehet noch hiute unde iemer mêr .
0,7 ze helle dâr umbe ein bitter schûr .
0,8 der in den schulden vunden wirdet .
0,9 dem gît in sînem hûse rûm .
0,10 der selp swarze hellewirt .
0,0 wie man über sich niht leben sol .
0,1 sun ich hân lange her vernomen .
0,2 swer über sich mit hôchvart wile .
0,3 daz sîn leben mac dâr zuo komen .
0,4 daz sich vervellet gar sîn spil .
0,5 ein iegelich man hât êren vile .
0,6 der reht in sîner mâze lebet .
0,7 unde übermizzet niet sîn zil .
0,8 swer sich ziuhet unde ie zôch .
0,9 daz in sîn vuore machet wert .
0,10 der wirdet an êren billîche hôch .
0,0 wie gemach bî êren niht en zimet .
0,1 sun wile dir lieben guot gemach .
0,2 sô muost dû êren dich bewegen .
0,3 an jungen manne ich nie gesach .
0,4 diu zwei gelîcher wâge wegen .
0,5 waz touc ein junger lîp verlegen .
0,6 der ungemach niht lîden kan .
0,7 noch sinnicliche nâch êren stegen .
0,8 ez ist mir âne zwîvel kunt .
0,9 ez löufet selten wîsiu mûs .
0,10 slâfenter vohen in den munt .
0,0 wie man niht êren mac haben âne arbeit .
0,1 sun wizze daz verlegenheit .
0,2 ist gar dem jungen manne ein slac .
0,3 ez sî dir offenliche geseit .
0,4 daz nieman êre haben mac .
0,5 noch herzen liebe sunder klage .
0,6 gar âne kumber unde âne nôt .
0,7 der luhs gêt sô niht in den sac .
0,8 swer sich vore schanden wile bevriden .
0,9 der mac geborgen niht dem lîbe .

0,10 noch dem guote noch den liden .
 0,0 wie man ze râte niht sol gên ungebeten .
 0,1 sun dû solt niht gên ungebeten .
 0,2 an vriundes noch an vîandes rât .
 0,3 ez mac den man in schaden weten .
 0,4 ob er dâ sitzet oder stât .
 0,5 ob man sîn gerne hête rât .
 0,6 sun dâ solt dû niht dringen zuo .
 0,7 vüre wâr ez ist ein missetât .
 0,8 kumest aber dû dar von vriundes bete .
 0,9 sô sliuz die scham vüre dînen munt .
 0,10 daz sich diu zunge iht übertrete .
 0,0 wie man luoder unde vrîheit vliehen sol .
 0,1 sun beidiu luoder unde spil .
 0,2 sint lîbes unde der sêle val .
 0,3 der âne mâze in volgen wile .
 0,4 si machent breit huobe smal .
 0,5 swer lebet âne êr in vrîer wal .
 0,6 der wirdet den werden schier unwert .
 0,7 unde hûset in dem affental .
 0,8 swer alsô verliuset sîne habe .
 0,9 mit disen swachen vuoren zwein .
 0,10 der læge baz in einem grabe .
 0,0 wie des vertuoærs vröuwede ist ein tôrheit .
 0,1 sun swen sîn sin verleitet sô .
 0,2 daz er unreht im selben tuot .
 0,3 ist er bî wîsen liuten vrô .
 0,4 dâ sol man kiesen tôren muot .
 0,5 diu riuwe ist nâch der schulde guot .
 0,6 ob si von herzen reht vert .
 0,7 ein vole in einer wilden stuot .
 0,8 unûzgevangen wirdet . êr . zam .
 0,9 ê daz ein ungerâten lîp .
 0,10 gewinne ein herze daz sich schame .
 0,0 wie ein man sol hûsêr tuon mit sîner habe .
 0,1 sun twinc des dînen vrîen sin .
 0,2 daz dû ze hûse rihtest dich .
 0,3 ein teil ich ungereisic bin .
 0,4 man tuot unde læt unvile durch mich .
 0,5 den armen gip snît unde brich .
 0,6 mit willen dîner reinen habe .
 0,7 ob allen ræten daz râte ich .
 0,8 ez ist dir guot unde wirdet ouch mir .
 0,9 ich hân in êren her gelebet .
 0,10 ze hûse wirfe ich den slegel dir .
 0,0 wie der vater hûses hât wole gepflegen .
 0,1 sun ob ich ungerüemet wole .
 0,2 unde âne unvuoge sprechen mac .

0,3 mit liebe ich dich bescheiden sol .
0,4 sît ich von êrsten hûses pflac .
0,5 dâ kom ich nie von einen tac .
0,6 mîn umbesæzen wizen wole .
0,7 wie dô mîn wort in êren lac .
0,8 ich hête noch vile guoten muot .
0,9 unde willic herze wan daz mir
0,10 daz alter grôzen schaden tuot .
0,0 waz ze dem hûse gehoert .
0,1 sun swer daz hûs nû haben wile .
0,2 der muoz driu dinc ze stiure hân .
0,3 güete milte unde zuht sô lît sîn spil .
0,4 ist er dâ bî ein vroelich man .
0,5 der ez wole den liuten bieten kan .
0,6 sô tuot dîn brôt dem nementen wole .
0,7 unde lachent beide einander an .
0,8 sun sint dir niht die tugende bî .
0,9 sô mac der gast wole rîten vüre .
0,10 swie gar er naz unde müede sî .
0,0 waz dem geschihet der mit unwitzen hûs hât .
0,1 sun swer mit tugenden hûses pfliget .
0,2 der nimet an werdicheit niht ab .
0,3 und alsô mit der mâze wiget .
0,4 daz im gevallen mac sîn habe .
0,5 unde krûche der an einem stabe .
0,6 gote unde der werlte wær er wert .
0,7 die rede ich in dîn herze grabe .
0,8 wile si dâr inne wurzen niht .
0,9 als einem vogel der . êr . zît .
0,10 von neste gevliuget dir geschihet .
0,0 wie wole hûsêr zieret .
0,1 sun hûsêr ist ein werdicheit .
0,2 diu bî den hôhesten tugenden vert .
0,3 swer si mit schoenen sinnen treit .
0,4 wie wole sich der in êren nert .
0,5 daz guot wirdet reinicliche verzert .
0,6 daz niht ein schade geheizen mac .
0,7 zwêne vrumen sint dâ von beschert .
0,8 gotes lôn unde der werlte danc .
0,9 der disiu zwei verdienen kan .
0,10 den rîchet wole sîn ackerganc .
0,0 wie man wârhaft sol sîn .
0,1 sun zwei dinc êrent wole den man .
0,2 der sich wile êren mit den zwein .
0,3 sô daz er sich behalten kan .
0,4 daz ein ist jâ daz ander ist nein .
0,5 wie ziert golt den edelen stein .
0,6 alsô tuont wâriu wort den lîp .

0,7 er ist niht vleisch unz ûf daz bein .
 0,8 dem alsô slipfic ist der sin .
 0,9 swâ er sîn jâ geheizen hât .
 0,10 daz er sîn nein dâ schrenket hin .
 0,0 wie man den ban vliehen sol .
 0,1 sun vliuch daz dich iht binde ein bant .
 0,2 daz ist gestricket in der aht .
 0,3 daz dû gebunden bist zehant .
 0,4 vore gote in krefticlicher maht .
 0,5 swer wirdet in sînen stric brâht .
 0,6 sô daz in vindet dâ der tât .
 0,7 wê im daz sîn ie wart gedâht .
 0,8 daz bant ist der gedienet ban .
 0,9 der klemmet in der helle alsô .
 0,10 daz Judas nie die nôt gewan .
 0,0 swaz kraft der ban habe .
 0,1 sun dannoch ander kraft er treit .
 0,2 den er gevazzet an sîn seil .
 0,3 er nimet im al die kristenheit .
 0,4 gemeine unde aller sælden teil .
 0,5 sîn wuntiu sêle wirdet niht heil .
 0,6 kumet er mit rehte niht dâr von .
 0,7 ie grôzer wirdet der sælden meil .
 0,8 gebet almuosen ist verloren .
 0,9 unde swaz er guotes mac getuon .
 0,10 die wîl in stichet dirre dorn .
 0,0 wie man missetât vliehen sol .
 0,1 sun vlüeche sint ein bitter krût .
 0,2 strâze und ire stîge gerne mît .
 0,3 si mac verleiten dir dîn hût .
 0,4 swie guot geleite man dir gît .
 0,5 gerihtes über dich ist zît .
 0,6 swâ man dich hoeret oder sihet .
 0,7 die wîl ûf dir ire boije lît .
 0,8 dâ lâ dich inne niht versmiden .
 0,9 kein zunge unde ist der rihtær guot .
 0,10 mac dich vore tôde niht bevriden .
 0,0 hier gît der vater ein ende sînem râte .
 0,1 sun ich wile dir nû niht mêre sagen .
 0,2 der mâze ein zil gestôzen sî .
 0,3 dû maht sîn allez niht getragen .
 0,4 nim ûz den ræten alle drî .
 0,5 lege si dem herzen nâhen bî .
 0,6 ob ez niht bezzer werden mac .
 0,7 wirdet gotes minne niemer vrî .
 0,8 wis wârhaft zühtic sunder wanc .
 0,9 manic tugent ire vluz nimet von den drîn .
 0,10 behalt si wole habe iemer danc .”

0,0 hier antwürtet der sun dem vater .
 0,1 “vater dû hâst veterlîchen mir .
 0,2 gerâten als ein wîser man .
 0,3 ich wile vile gerne volgen dir .
 0,4 ob mir got sîner helfe gan .
 0,5 diu alliu dinc volenden kan .
 0,6 sîn unvolmezzzen hôhiu tugent .
 0,7 bite ich iemer unde mane .
 0,8 daz ich im hier ze dieneste lebe .
 0,9 alsô daz er mir dâr umbe dort .
 0,10 sînes vateres himelrîche gebe .
 0,0 wie wereltlîchiu wünne ist ein mist .
 0,1 vater ich bin ein kint doch sihe ich wole .
 0,2 daz disiu werlt ein goukel ist .
 0,3 ire vrôuwede erlischet als ein kole .
 0,4 ire bezzistiu wünne wirdet ein mist .
 0,5 ire trôst ist gar ein ungenist .
 0,6 si lât ire vriunde in swacher habe .
 0,7 des dû wole innen worden bist .
 0,8 dû hâst ie her gedienet ir .
 0,9 nû merke waz ire trûgeheit
 0,10 ze lône habe gegeben dir .
 0,0 wie widerstentic daz alter ist .
 0,1 vater alter lîp unde müediu lit .
 0,2 diu zwei sint dîn mit voller habe .
 0,3 dû wære . êr . snel nû gât dîn trit .
 0,4 ze nâhen leider bî dem stabe .
 0,5 dâ grûset mir von schulden ab .
 0,6 ob dîn schult manicvalt .
 0,7 dem lîbe volget hin ze dem grabe .
 0,8 dîn rât ist kranc ob daz geschihet .
 0,9 des mannes wîstuom ist niet guot .
 0,10 ist er im selber wîse niht .
 0,0 wie der alt sol guot bilede geben .
 0,1 vater disem manne schône zimet .
 0,2 daz er tuo wole mit stæten siten .
 0,3 dâ bî ein tumber bilede nimet .
 0,4 daz würde vile lîhte sus vermiten .
 0,5 ein alter man mit tumben siten .
 0,6 der niht bedenket waz er ist .
 0,7 unde waz got durch in hât erliten .
 0,8 der ist in tôren aht gemuot .
 0,9 ez ist ein lop vore allem lobe .
 0,10 der an dem ende rehte tuot .”
 0,0 hier rætet der dem vater . daz si sich begeben .
 0,1 “vater mit urloube wile ich dir .
 0,2 mîn herze entsliezen überal .
 0,3 ez mac sich niht verhelen bî mir .

0,4 dû solt vüre dîner sünden val .
0,5 legen ûf dîn eigen ein spitâl .
0,6 unde solt dich selber ziehen dâr in .
0,7 ich var mit dir in vrîer wal .
0,8 alle unser habe sulen wir dar sellen .
0,9 und vüre der werlt trûgeheit .
0,10 daz süeze himelrîche welen .”
0,0 hier wile im der vater volgen .
0,1 “sun die rede ûz dem herzen dîn .
0,2 gesprochen hât ein wîser geist .
0,3 ich vröuwe mich in dem herzen mîn .
0,4 daz dû von gote sô vile weist .
0,5 des râtes wile ich sîn volleist .
0,6 wan dû stüente ie mînem willen nâch .
0,7 doch liez ich durch dich allermeiste .
0,8 ich hân gelebet nû lieben tac .
0,9 daz dû ze gote dich wilt begeben .
0,10 unde ich mit dir gebüezen mac .”
0,0 wie sich der vater vröuwet .
0,1 “sun swaz ich vröuweden ie gewan .
0,2 die sint bî disen vröuweden blint .
0,3 sît ich von dir vernomen hân .
0,4 daz dir die sünde unmære sint .
0,5 ich sage dir herzenliebez kint .
0,6 wir koufen in dem sacke niht .
0,7 an dînem muote niht erwint .
0,8 ob wir hier unser zwîvelleben .
0,9 umbe einez daz uns iemer wert .
0,10 mit vröuweden williclîche geben .”
0,0 hier weinet der vater . unde troestet in der sun .
0,1 ûz ougen muoste er wange baden .
0,2 von herzenliebe daz geschach .
0,3 der sun sprach “vater ir tuot iu schaden .
0,4 ir volget wîbes siten nâch .
0,5 die man ie lîhte weinen sach .
0,6 dâ hoeret niht wan vröuwede zuo .
0,7 unde hier des lîbes ungemach .
0,8 ez ist niht ein kindez spil .
0,9 der mit des lîbes arbeit .
0,10 ze rehte sünde büezen wile .”
0,0 hier bitet er got daz er im wâr riuwe verlihe .
0,1 “got hêrre die dîne trinitât .
0,2 unde dîne starken goteheit .
0,3 erbarmen sol mîn missetât .
0,4 ich mane dich dîner barmicheit .
0,5 diu rehter riuwe ist bereit .
0,6 daz dû mir rehte riuwe gebest .
0,7 sô daz mir sî von schulden leit .

0,8 daz ie der lîp gesündet hât .
 0,9 daz iht des sî diu sêle pfant .
 0,10 durch dîne tugent des hilf mir ab .”
 0,0 hier begert er daz im geschehe als dem schâchær ane dem kriuze .
 0,1 “got hêrr dû weist alsô wole daz ich bin .
 0,2 von sünden ein vertiefeter man .
 0,3 unde daz mîn sælden vrîer sin .
 0,4 noch stæte riuwe nie gewan .
 0,5 sît ich mich sünden – êrst versan .
 0,6 nû bin ich in mîn alter komen .
 0,7 unde ruofe dîne marter an .
 0,8 unde dîne tugent manicvalt .
 0,9 daz als dem schâchær mir geschehe .
 0,10 der spæter riuwe nie entgalt .”
 0,0 hier klaget er daz er sich niht hât begeben .
 0,1 “ich bin in den wîngarten brâht .
 0,2 durch bûwen houwen unde jeten .
 0,3 und hân mich leider überdâht .
 0,4 daz ich vile vruo wart dar gebeten .
 0,5 daz ich den rât hân übertreten .
 0,6 unde hât daz alter mit gewalt .
 0,7 in sînem stricke mich . geweten .
 0,8 daz ich verslâfen hân die zît .
 0,9 dâ von muoz ich ze danke nemen .
 0,10 ein lôn daz mir der meister gît .”
 0,0 hier verjihet er sîner sünde .
 0,1 “dû bist genædic unde guot .
 0,2 milte unde erbarmic hêrr got .
 0,3 dem süntær ob er sînen muot .
 0,4 von sünden nimet durch dîn gebot .
 0,5 sô starc ist mîner sünden nôt .
 0,6 ez undervar dîn gotelich tugent .
 0,7 diu ie den rechten helfe bôt .
 0,8 mîn sêl muoz in bûze klagen .
 0,9 daz mînen lîp mîn muoter ie .
 0,10 ze disen noeten hât getragen .”
 0,0 hier vlêhet er aber gote umbe sîn sünde .
 0,1 “got hêrr sît diu kleinen kint .
 0,2 von ire gebürte tages alt .
 0,3 niht gar von sünden reine sint .
 0,4 wie wart ez danne umbe mich gestalt .
 0,5 des hât dîn barmicheit gewalt .
 0,6 mîn pfant stêt leider ûf den schaden .
 0,7 des ich noch nie ein teil vergalt .
 0,8 hilf hêrr ich mac vergelten niht .
 0,9 dîn milte diu sol mir stiur geben .
 0,10 der pfender grôzer buoze jihet .”
 0,0 wie got weiz alliu tougen .

0,1 "got dir sint alliu herzen kunt .
 0,2 ein winkel nie sô enge wart .
 0,3 von oben unz ûf der erde grunt .
 0,4 der dîner wîsheit wær verspart .
 0,5 dîn tugende sint in reiner art .
 0,6 daz dû den süntær niht vertuost .
 0,7 geriuwet in der sünden vart .
 0,8 unde hât ze buoze vesten sin .
 0,9 dû sihest in mîn herzen wole .
 0,10 daz ich in stæter riuwe bin ."

0,0 hier bitet er got daz er im buoze gûnne .
 0,1 "got die gâbe hâs dû mir gegeben .
 0,2 gip mir noch dîner helfe mêr .
 0,3 lâz mich noch hier als lange leben .
 0,4 daz mir geschehe in buoze wê .
 0,5 ze wole ist mir gewesen . êr .
 0,6 ich lie durch dîn vorhte niht .
 0,7 durch dîne liebe alsam â wê .
 0,8 sol ich daz hier gebüezen niht .
 0,9 die wîl ich in der werlt gelebe .
 0,10 wie wê mir danne dort geschihet ."

0,0 hier manet er got bî den heiligen .
 0,1 "Maria Magdalena was .
 0,2 mit houbetsünden überladen .
 0,3 von starker riuwe si genas .
 0,4 man sach si dîne vüeze baden .
 0,5 mit zehern vüre der sünden schaden .
 0,6 dem milten Jop ze teile wart .
 0,7 ire sünde swunden alle von dir .
 0,8 sanct Johannes wart mit lüppe vergeben .
 0,9 dû hilf uns hêrre von unser nôt .
 0,10 dû gæbe in dort ein iemerleben ."

0,0 hier manet er got bî Jonas unde bî den drîen kinden .
 0,1 "dîn ungemezzen kraft Jonam .
 0,2 daz muoz man vüre ein wunder wegen .
 0,3 ûz eines visches wambe nam .
 0,4 dâr inne er was drî tage gelegen .
 0,5 drîen kinden half dîn gotelich segên .
 0,6 daz in diu vlamme niht en tet .
 0,7 ich bin in sünden gar verlegen .
 0,8 daz riuwet mich unde ist mir leit .
 0,9 dû maht ouch wunder an mir tuon .
 0,10 sô kreftic ist dîn barmicheit .
 0,0 hier gert er daz in got bewar vore hôchvart .
 0,1 got dîn kraft ist allen kreften vore .
 0,2 dû niderst hôhest swen dû wilt .
 0,3 waz half daz Nabuchodonosor .
 0,4 gewaltes hête unde rîchheit vile .

0,5 von hôchvart sich verviel sîn spil .
 0,6 daz er ze walde wilde lief .
 0,7 der tage ein lanc gemezzen zil .
 0,8 an allen vieren kleider bar .
 0,9 vore dînem zorne den ich hân .
 0,10 verdienet hêrre mich bewar .
 0,0 wie guot diu wâr riuwe ist .
 0,1 wie mohte ich allez daz volsagen .
 0,2 daz dû ie her gewundert hât .
 0,3 ich muoz dir mîn sünde klagen .
 0,4 der trage ich alze swæren last .
 0,5 ich wær in gerne ein vremeder gast .
 0,6 swie gar ich sündenmælic sî .
 0,7 doch wonet in mir der riuwe ein ast .
 0,8 der ist von dîner maht beliben .
 0,9 ich troeste mich diu riuwe ist guot .
 0,10 daz vinde ich in dem blate geschriben .”
 0,0 hier tuot er sîn bîhte .
 0,1 “got ich tuon mîn bîhte dir .
 0,2 als ein süntær sol unde muoz .
 0,3 erzeige dîne helfe mir .
 0,4 sô daz mir werde sorgen buoz .
 0,5 die wîl ich mac hant unde vuoz .
 0,6 gerüeren des muoz ich dich biten .
 0,7 maget unde muoter durch den gruoz .
 0,8 den dir von gote der engel sprach .
 0,9 ze dînem kinde sprich mîn wort .
 0,10 dîn helfe ie starken kumber brach .”
 0,0 hier vlêhet er got umbe hulde .
 0,1 “got ich hân der werlte mich bewegen .
 0,2 unde sol nû als ein süntic man .
 0,3 in riuwe unde ouch in buoze leben .
 0,4 wê daz ich ie den muot gewan .
 0,5 der wider dich iht hât getân .
 0,6 daz riuwet mich unde ist mir leit .
 0,7 nû lâ mich dîn hulde hân .
 0,8 nâch bezzerunge hêrre got .
 0,9 genædiclîchen über mich .
 0,10 ergê dîn wille unde dîn gebot .”
 0,0 hier vergît er unde entseit sich alles sînes guotes .
 0,1 “von herzen in vergeben sî .
 0,2 die mir ie her getâten leit .
 0,3 mîn eigenliute ich lâze vrî .
 0,4 mîn huobengelt smal unde breit .
 0,5 daz man mir bûwete unde sneit .
 0,6 vüre eigen des verzîhe ich mich .
 0,7 ich hân ez ûf ein spitâl geleit .
 0,8 ez sol vürebaz der armen sîn .

- 0,9 ich unde mîn eingeborener sun .
 0,10 zuo in uns wellen ziehen dâr in .”
- 0a,0 ditz buoch seit nû von der vrouwen werdicheit .
 0a,1 “wir vrouwen wolten mohte ez sîn .
 0a,2 der von dem lîbe wær guot .
 0a,3 daz er den offenbæren schîn .
 0a,4 mit tugenden lieze wole behuot .
 0a,5 swie wole er ez under dem helme tuot .
 0a,6 er hât uns vrouwen niht gewert .
 0a,7 er ne habe dâ bî doch hövischen muot .
 0a,8 wir vrouwen loben decheines tât .
 0a,9 der ûzen lêhenkeppelîn .
 0a,10 unde heim gezogen schande hât .”
- 0b,0 wie die vrouwen habent unzæme meisterschaft
 0b,1 “wir vrouwen haben nû meister mêr .
 0b,2 denne uns diu mâze schuldic sî .
 0b,3 ire beseme zôch die bezzisten . êr .
 0b,4 nû ist uns maniges beseme bî .
 0b,5 der selp ist aller zûhte vrî .
 0b,6 mich müejet der niht gemezzen kan .
 0b,7 mit rehter vuoge vûeze drî .
 0b,8 daz der den vrouwen mezzen wile .
 0b,9 nâch kranker lêr ire lûter leben .
 0b,10 der meisterschaft ist gar ze vile .”
- 1b,0 hier râtet ein muoter irere tohter .
 1b,1 ein wîplich wîp in zûhten sprach .
 1b,2 ze ire tohter der si schône pflac .
 1b,3 “wole mich daz ich dich ie gesach .
 1b,4 gehôhet sî der sûeze tac .
 1b,5 dô dîn geburt von êrst an lac .
 1b,6 sît ich mit ganzer wârheit wole .
 1b,7 mit wîser volge sprechen mac .
 1b,8 dîn anblic sî eines meien zît .
 1b,9 got sulen wir iemer gerne loben .
 1b,10 der alsô rîche gâbe gît .”
- 2b,0 hier antwûrtet diu tohter .
 2b,1 “diz volge ich liebiu muoter dir .
 2b,2 ich lobe in sô ich bezziste kan .
 2b,3 er sol der sinne helfen mir .
 2b,4 daz ich in sehe mit vorhten an .
 2b,5 durch sîn tugent ich in des mane .
 2b,6 ich sol nâch sînen hulden leben .
 2b,7 ob ich mir selber êren gan .
 2b,8 vater unde muoter sulen diu kint .

- 2b,9 wole êren daz hât er geboten .
 2b,10 wole in die des gehôrsam sint .”
- 3b,0 hier râtet diu muoter ire tohter .
 3b,1 “vile liebiu tohter mir behaget .
 3b,2 dîn rede unde ouch dîn antwûrte wole .
 3b,3 ûf den muot mîn triuwe mich jaget .
 3b,4 daz ich dir ez bezziste râten sol .
 3b,5 ez würde mînes herzen dol .
 3b,6 ob dîn lobe wîplich unde ganz .
 3b,7 von dînen schulden wurden hol .
 3b,8 dâ von uns beide got bewar .
 3b,9 unde sîner lieben muoter kraft .
 3b,10 daz dîn muot iemer sô gevar .”
- 4b,0 hier rætet diu tohter .
 4b,1 “sage liebiu muoter unde sprich .
 4b,2 wie unde waz dîn wille sî .
 4b,3 ich hân des gar vereinet mich .
 4b,4 ich wile dir sîn mit volge bî .
 4b,5 diu jugent wile vrô sîn unde vrî .
 4b,6 der beider hân ich mich bewegen .
 4b,7 diu hôchvart vellet êren zwî .
 4b,8 sich wile mîn herze lâzen nider .
 4b,9 swelich wîp kumet nû in swaches wort .
 4b,10 wie müelîche si sich verrihtet wider .”
- 5b,0 hier rætet diu muoter .
 5b,1 “trût kint dû solt sîn hôchgemuot .
 5b,2 dâr under doch in zûhten leben .
 5b,3 sô wirdet dîn lop den bezzisten guot .
 5b,4 unde stêt dîn rôsenkranz dir eben .
 5b,5 den êren gernten solt dû geben .
 5b,6 ze rehte dînen werden gruoz .
 5b,7 unde lâz in dînem herzen sweben .
 5b,8 scham unde mâze ûf stæten pîne .
 5b,9 schiuz wilder blicke niht ze vile .
 5b,10 dâ lôse merkær bî dir sîn .”
- 6b,0 dô sprichet diu tohter
 6b,1 “scham unde mâze sint zwô tugende .
 6b,2 die gebent uns vrouwen hôhen prîs .
 6b,3 wile si got lieben mîner jugent .
 6b,4 sô gruonet mîner sælden rîs .
 6b,5 unde mac in zûhten werden grîs .
 6b,6 bewîse liebiu muoter mich .
 6b,7 der rede baz ich bin niht wîs .
 6b,8 wie wilde blicke sîn gestalt .

6b,9 wie wâ ich die vermîden sule .
6b,10 daz si mich machen iht ze balde .”

7b,0 diu muoter sprichet .
7b,1 “ez heizent wilde blicke wole .
7b,2 als ich ze hove bewîset bin .
7b,3 als ein wîp vûre sich sehen sol .
7b,4 daz ir diu ougen vliegert hin .
7b,5 sam ob si habe unstæten sin .
7b,6 und âne mâze daz geschihet .
7b,7 daz ist ire lobe ein ungewin .
7b,8 die meldær merket unser site .
7b,9 twinc dîniu ougen dester baz .
7b,10 daz râte ich tochter unde bite .”

8b,0 diu tochter .
8b,1 “vûre wâr dir muoter sî gesaget .
8b,2 swie kleine ich habe der jâre zal .
8b,3 daz mir diu vuore niht behaget .
8b,4 swelich wîp diu ougen ûf ze tal .
8b,5 in dem houbete vûert als einen bal .
8b,6 dâr under ouch gelachet vile .
8b,7 der prîset niht diu zuht ire sal .
8b,8 ich wæne ouch daz juncvrouwen muot .
8b,9 diu âne vorht wirdet erzogen .
8b,10 nâch irem site vile dicke tuot .”

9b,0 diu muoter .
9b,1 “sint wîsiu werc den worten bî .
9b,2 sô sint die sinne niht betrogen .
9b,3 sint aber si guoter sinne vrî .
9b,4 sô sint die wîsen werc gelogen .
9b,5 von neste ein vogel ze vruo gevlogen .
9b,6 der wirdet den kinden . lîhte ein spil .
9b,7 die vedern werdent im gezogen .
9b,8 daz mac dir liebez kint geschehen .
9b,9 hâs dû in jugent gar wîsiu wort .
9b,10 unde lâst dich tumbe an werken sehen .”

10b,0 hier rætet diu tochter .
10b,1 “sint mîniu wort wîs âne werc .
10b,2 des lobe ich niht ez ist niwîht .
10b,3 ze wiu solte mir ein guldîn berc .
10b,4 des ich geniezen mohte niht .
10b,5 ein ouge licht daz niht gesihet .
10b,6 daz zeiget selten guoten wec .
10b,7 waz ob diu sælde mir geschihet .
10b,8 daz ich in beiden ob gelige .

- 10b,9 unde dîner lêre volge sô .
 10b,10 daz ich untugenden an gesige .”
- 11b,0 hier wünschet ir diu muoter tugent
 11b,1 “got gebe daz dir dîn dinc ergê .
 11b,2 als dû hâst muot unde gedanc .
 11b,3 waz wile ich danne vrôuweden mêr .
 11b,4 wirdet dîn lop niht von schulden kranc .
 11b,5 des sagent dir die bezzisten danc .
 11b,6 weist dû niht wie diu sûeze maget .
 11b,7 Lûnete nâch lobe mit tugenden ranc .
 11b,8 vilelîhte dir ouch daz geschihet .
 11b,9 ob man niht durch vrîen muot .
 11b,10 ûz wîbes tugenden brechen sihet .”
- 12b,0 si bitet ire muoter daz si si zuht unde êr lêr .
 12b,1 “diu wehselrede ein ende habe .
 12b,2 die sulen wir ûf daz rîche geben .
 12b,3 daz dester grôzer sî sîn habe .
 12b,4 unde lêre mich nâch êren leben .
 12b,5 gebâren unde sprechen eben .
 12b,6 daz ich den wîsen wole behage .
 12b,7 daz wile ich niemer übergeben .
 12b,8 tuon ich niht den willen dîn .
 12b,9 sô hâs dû dich entbunden wole .
 12b,10 unde muoz ich eine schuldic sîn .”
- 13b,0 hier lêrt si si zuht unde êr .
 13b,1 “wis liebiu tohter wolegemuot .
 13b,2 daz doch der zuht die sinne pflegen .
 13b,3 wis stæter site von herzen guot .
 13b,4 sô hâs dû guoter liute segên .
 13b,5 maht dû die tugent ûf gewegen .
 13b,6 dir wirdet von manigem werden manne .
 13b,7 mit wûnschen nâhen bî gelegen .
 13b,8 solt dû mit sælden werden alt .
 13b,9 zuo der schoene die dû hâst .
 13b,10 durch dich verswendet wirdet der walt .”
- 14b,0 si jihet si welle ir volgen .
 14b,1 “sol muoter mir daz ein êre sîn .
 14b,2 ob man mîn wünschet ûf ein strô .
 14b,3 des ahtent niht die sinne mîn .
 14b,4 daz im von herzen sî alsô .
 14b,5 ich wile in zûhten wesen vrô .
 14b,6 als mînen jâren wole an stât .
 14b,7 mîn lop in êren ziehen hôch .
 14b,8 daz ie der werden wille was .

- 14b,9 ich wile dâr an unschuldic sîn .
14b,10 ob man mîn wünschet ûf daz gras .”
- 15b,0 diu muoter jihet man ger der tohter mit gedanken .
15b,1 “gedanke sint den liuten vrî .
15b,2 unde wûnschen sam weist dû des niht .
15b,3 daz maht dû verstân dâ bî .
15b,4 sô man ein wîp ie schoener sihet .
15b,5 der man in tugenden êre jihet .
15b,6 der wünschet ir wirdet im es niht mêr .
15b,7 hât er ze minne muotes iht .
15b,8 ein iegelich sin des hôhesten gert .
15b,9 sô man gedenket ofte an dich .
15b,10 unde wünschet dîn sô bist dû wert .”
- 16b,0 hier rætet diu tohter
16b,1 “daz ich der werden lop bejage .
16b,2 dâ wile ich iemer jagen nâch .
16b,3 den swachen ich unwillen trêge .
16b,4 die man untât ie werben sach .
16b,5 ein wîser man hier vore sprach .
16b,6 ze swacher heimeleche wirdet man siech .
16b,7 diu prüvet schande unde ungemach .
16b,8 ein iegelich man mac wûnschen mîn .
16b,9 swem aber mîn schapel werden sol .
16b,10 der muoz vile wole gevieret sîn .”
- 17b,0 hier lêrt diu muoter aber ire tohter .
17b,1 “dû sprichest wole mîn liebez kint .
17b,2 der süezen rede ich dir wole gan .
17b,3 wer weiz nû wâ die stæten sint .
17b,4 vile missewentic sint die man .
17b,5 si tragent helekeppelîn an .
17b,6 ze guoten wîben süeziu wort .
17b,7 diu meiste menige sprechen kan .
17b,8 doch mêrenthalbe niht âne schaden .
17b,9 versnident dich ire keppelsnite .
17b,10 dû muost diu wange ûz ougen baden .”
- 18b,0 hier antwürtet diu tohter .
18b,1 “waz ahte ich ûf ire keppelîn .
18b,2 dâ si ire vriunt versnident mit .
18b,3 ich getrûwe dem stæten herzen mîn .
18b,4 mich vâhet niht ire wehselsite .
18b,5 mîn stætez herze wole entbiret .
18b,6 daz ez mich vride vore ire untât .
18b,7 ich vûrhte niht ire wehselsnit .
18b,8 die sulen mich vinden in der aht .

- 18b,9 daz mich iht triege ire lôsiu rede .
18b,10 got gebe in allen guote naht .”
- 19b,0 wie diu wîp solten stæter sîn .
19b,1 “si sagent wir wîp haben kurzen muot
19b,2 unde dâ bî alle langez hâr .
19b,3 dem gelîche vile manigiu leider tuot .
19b,4 sô si daz sprichwort machet wâr .
19b,5 swie ez umbe der manne unstæte var .
19b,6 wir wîp solten doch stæter sîn .
19b,7 ob ich ez in hulden reden getar .
19b,8 unde trûegen in gemeinen haz .
19b,9 die niht ire zuht an uns bewarent .
19b,10 si schôneten unser dester baz .”
- 20b,0 wie diu wîp sulen guotlîche versagen .
20b,1 “ez ist komen her in alten siten .
20b,2 vore manigen jâren unde tagen .
20b,3 daz man diu wîp sol guotlîche biten .
20b,4 unde lieplîche in dem herzen tragen .
20b,5 sô sulen si zûhticlîche versagen .
20b,6 oder aber ze sinniclîche gewern .
20b,7 daz si ez her nâch niht en klagen .
20b,8 diu spæte riuwe ist niwiht .
20b,9 dâr zuo der wandelbæren spot .
20b,10 her nâch sô der schade geschihet .”
- 21b,0 hier sprichet diu muoter .
21b,1 “dû bist der sinne ûf rehtem wege .
21b,2 des vrôuwe ich mich vile liebez kint .
21b,3 behalt si wole in dîner pflege .
21b,4 daz dich diu minne iht mache blint .
21b,5 vile wîsiu herze entzündent sich .
21b,6 von ire gewalt daz ist mir wole kunt .
21b,7 die rede ze beine niht en bint .
21b,8 wilt dû dich ire gewaltes weren .
21b,9 sô müeze got dînen jungen lîp .
21b,10 mit sîner starken kraft ernerren .”
- 22b,0 diu tohter jihet si habe vesten muot .
22b,1 “mîn herze ich selp erkennen sol .
22b,2 der minnen kraft ist mir unkunt .
22b,3 ich spriche ez ungerüemet wole .
22b,4 ich wart nie von ire strâle wunt .
22b,5 unde lebe noch her mit gesunt .
22b,6 vrouwe minne weiz diu herzen wole .
22b,7 diu mac twingen an ire grunt .
22b,8 der herzen ich niht einez trâge .

- 22b,9 dâ von der minne meisterschaft .
22b,10 an sîner werdicheit verzage .”
- 23b,0 diu muoter jihet diu tohter mûge sich niht behûeten vore der minne .
23b,1 “ob hundert tûsent herzen kraft .
23b,2 an einem herzen mohte ligen .
23b,3 ire ungemezzeniu meisterschaft .
23b,4 im kurzeliêche mohte ab gesigen .
23b,5 si hât vile kargiu herzen erstigen .
23b,6 kûninc Salomon swie wîs er was .
23b,7 ir wart sîn herze niht verzigen .
23b,8 wile si dir in dîn herze smiden .
23b,9 des maht dû niemer dich erwerben .
23b,10 dich well aleine got bevriden .”
- 24b,0 si jihet si welle sich wole behûeten .
24b,1 “dû sprichest muoter dem gelîche .
24b,2 sam dich ire kraft gerûeret habe .
24b,3 swie gar ire maht sî krefte rîche .
24b,4 ich kume doch ire gewaltes ab .
24b,5 ich liez . êr . tragen mich ze grabe .
24b,6 êr . si mîn herze mit gewalt .
24b,7 alsam ein spiegelglas ergrabe .
24b,8 kumet aber si dâr in unde sperret zuo .
24b,9 genise ich oder bin ich tôt .
24b,10 sô sage mir danne waz ich tuo .”
- 25b,0 hier antwurtet ir diu muoter .
25b,1 “dû jihest si habe gerûeret mich .
25b,2 hier vore bî mînen jungen tagen .
25b,3 ob ez sô hât gevûeget sich .
25b,4 dâ wile ich dir niht vile von sagen .
25b,5 alsô der hunt den hirz wile jagen .
25b,6 hât er iht wole genozzen vore .
25b,7 der mac sich dester wîrs entsagen .
25b,8 swen hôhiu minne twingen gert .
25b,9 der sol unvuoge lâzen gar .
25b,10 unde mache sich den werden wert .”
- 26b,0 hier vrâget si ire muoter .
26b,1 “bin ich dir dester lieber iht .
26b,2 ob minne twinget mînen sin .
26b,3 unde von gewelte daz geschihet .
26b,4 ich wile niht in dem zwîvel sîn .
26b,5 nû tuo mir dînen willen schîn .
26b,6 daz diene ich iemer umbe dich .
26b,7 gevar ich wole diu êr ist mîn .
26b,8 ich hân gerihtet mînen muot .

- 26b,9 swaz dir an mir gevellet wole .
 26b,10 daz mich daz selbe dunket guot .”
- 27b,0 hier antwurtet ir diu muoter .
 27b,1 “ich wile dir mînen willen sagen .
 27b,2 den solt dû reht alsô verstân .
 27b,3 maht dû ein kiuschez herze tragen .
 27b,4 des muost dû lop unde êre hân .
 27b,5 ob dir diu minne des niht en gan .
 27b,6 unde wile betwingen mit gewalt .
 27b,7 dich daz dû minnest einen man .
 27b,8 der sælden ist unde êren wert .
 27b,9 der sol doch nâch dem willen mîn .
 27b,10 von dir belîben ungewert .”
- 28b,0 diu tohter jîhet si behüete ire êre .
 28b,1 “ich wile dir des mîn triuwe geben .
 28b,2 die kristen . ê . gesetzet hât .
 28b,3 die wîl ich einen tac sol leben .
 28b,4 ich gebriche niemer dînen rât .
 28b,5 ob mich diu minne niht en lât .
 28b,6 si welle mich twingen mit gewalt .
 28b,7 ob ez danne den zûhten wole an stât .
 28b,8 vile liebiu muoter sô ger ich .
 28b,9 ob dû die volge sehest an mir .
 28b,10 daz dû mit riemen bindest mich”
- 29b,0 diu muoter jîhet diu huote sî niwiht .
 29b,1 “ich wile dîn tohter hüeten niht .
 29b,2 dîn stæter muot dîn hüeten muoz .
 29b,3 ob dir von minne kraft geschihet .
 29b,4 daz dir ze balde stêt der vuoz .
 29b,5 des schaffe dir dîn stæte buoz .
 29b,6 mac si ire kreften an gesigen .
 29b,7 sô dienst dû der werden gruoz .
 29b,8 diu huote prüevet dicke schaden .
 29b,9 swer hüetet anders danne er sol .
 29b,10 der wile ze hûse unêre laden .”
- 30b,0 wie ein êrbær wîp . ir selber hüeten sol .
 30b,1 “ein reinez wîp in tugenden wert .
 30b,2 diu wole ire êren hüeten kan .
 30b,3 unde niht wan stæter triuwen gert .
 30b,4 die sol man selbe hüeten lân .
 30b,5 man sol die huote heben an .
 30b,6 an einem wîbe tumber site .
 30b,7 diu niht ir selber êren gan .
 30b,8 man mac ir einez undersehen .

- 30b,9 dâ si ire vrîheit trîbet zuo .
 30b,10 daz vûrebaz müelîche kan geschehen .”
- 31b,0 wie diu huote sî niwiht âne volge .
 31b,1 “diu huote ist niht ein swærer pîn .
 31b,2 swâ vriunt wile minnen vriundes rât .
 31b,3 tuot er daz mit herzen schîn .
 31b,4 sô daz er soliche missetât .
 31b,5 verber diu an sîn êre gât .
 31b,6 sô hât der huotær guoten muot .
 31b,7 ob im diu volge bî gestât .
 31b,8 sol wîser rât der volge entbern .
 31b,9 der alsô vrouwen hûeten sol .
 31b,10 der zamet lîhter wilden beren .”
- 32b,0 wie schade es sî der reiner wîbe hûetet .
 32b,1 “diu huote ist wîbes êren gram .
 32b,2 swâ si ûf kranken wân geschihet .
 32b,3 ire ende guot ich nie vernam .
 32b,4 betwungen liebe ist gar niwiht .
 32b,5 wan si gît hôhes muotes niht .
 32b,6 diu liebe sol von herzen komen .
 32b,7 unde haben mit stæter triuwe pfliht .
 32b,8 ûf alle verlust unde ûf gewin .
 32b,9 diu ander liebe slipfic ist .
 32b,10 alsam ein îs dâ her dâ hin .”
- 33b,0 hier lobet si ire tohter schoene unde ire zuht .
 33b,1 “nû lâzen wir die huote varen .
 33b,2 unde sagen von der minne mêr .
 33b,3 maht dû dich vore ire kraft bewaren .
 33b,4 als dû mir hâst verjehen . êr .
 33b,5 swem danne ein schapel schoener stê .
 33b,6 mîn kint denne dir daz dîne tuo .
 33b,7 dâ man die werden schouwen gê .
 33b,8 daz lâze ich iemer âne haz .
 33b,9 ez mac ein wîp wole schoener sîn .
 33b,10 decheiniu lebet in zûhten baz .”
- 34b,0 diu tohter vrâget wâ diu minne wone .
 34b,1 “dû lobest mich liebiu muoter mîn .
 34b,2 alsam ein kint ire muoter sol .
 34b,3 ich lige dir in dem herzen dîn .
 34b,4 unde tuon dir in den ougen wole .
 34b,5 mîn triuwe gein dir ist ouch niht hol .
 34b,6 dû bist mir lieber danne der lîp .
 34b,7 der liebe ist gar mîn herze vol .
 34b,8 nû sage mir ob diu minne lebe .

- 34b,9 unde hier bî uns ûf erde sî .
34b,10 oder ob uns in den lûften swebe .”
- 35b,0 hier antwûrtet ir diu muoter .
35b,1 “ein wîser man Ovidius .
35b,2 der tuot uns von ire wunder kunt .
35b,3 er jîhet siu sî genant Venus .
35b,4 si mache süeziu herzen wunt .
35b,5 unde nâch ire willen wider gesunt .
35b,6 den selben aber wider siech .
35b,7 daz ist ire wehsel ze aller stunt .
35b,8 ire willen niht entrinnen mac .
35b,9 si vert unsihtic als ein geist .
35b,10 si hât niht ruowe naht noch tac .”
- 36b,0 hier rætet diu tohter .
36b,1 “sint alliu herzen in ire gebote .
36b,2 der êren ich ir niht en gan .
36b,3 ez werdent liehtiu ougen rô .
36b,4 sulen hôch gern die nidern man .
36b,5 von den kein êre werden kan .
36b,6 unde sulen die hôhen nider geren .
36b,7 der got sich wunderlîche versan .
36b,8 der ire gewalt sô wîten maz .
36b,9 die hôhen solten hôhe geren .
36b,10 die nideren nider daz stüente baz .”
- 37b,0 wie man die werden gerne minnet .
37b,1 “wie hôch edeliu minne vert .
37b,2 diu wirbet sunder wân niht sô .
37b,3 sint si an hôhen tugenden wert .
37b,4 die si in zuhten vindet vrô .
37b,5 die zîuhet si mit ir sô hôch .
37b,6 dâ si versmæhet swache site .
37b,7 si lât des niht durch vürsten drô .
37b,8 si slieze ein herze in daz ander gar .
37b,9 die nâch ire willen ir behagent .
37b,10 der nidern nimet si kein war .”